

四庫全書

集部

欽定四庫全書

鄧峯真隱漫錄卷十

宋 史浩 撰

奏議

回奏宣示御製原道辨

觀韓愈原道因言佛老之相混三教之相絀未有能辨之者但文繁而理迂揆聖人之用心則未昭然矣何則釋氏專窮性命弃外形骸不染萬相而於世事了不相

關又何與禮樂仁義哉然尚猶立五戒曰不殺不淫不盜不飲酒不妄語夫不殺仁也不淫禮也不盜義也不飲酒智也不妄語信也如此於仲尼又何遠乎孔子從容中道聖人也聖人之所為孰非禮樂孰非仁義又烏得而名焉譬如天地運行陰陽循環之無端豈有意為春夏秋冬之別哉皆聖人強名之耳亦猶仁義禮樂之別聖人所以設教治世不得不然也因其強名推而求之則道也者仁義禮樂之宗也仁義禮樂者固道之用

也彼揚雄以老氏棄仁義滅禮樂今迹老子之書其所  
寶者三曰慈曰儉曰不敢為天下先孔子則曰溫良恭  
儉讓又曰惟仁為大老子之所謂慈豈非仁之大者耶  
曰不敢為天下先豈非讓之大者耶至其言治道則互  
見偏舉所貴者清靜寧一而與孔聖果相背馳乎蓋三  
教末流昧者執之自為異耳夫佛老絕念無為修一身  
而已矣孔子立五教以治天下者也特所施不同耳譬  
猶以耒耜而織機杼而耕後世徒紛紛而惑固失其理

或曰當如何哉曰以佛修心以道養生以儒治世則可也又何惑焉愈之論從其迹而已不言其所以同者故作原道辨

臣今月十六日蚤刻直殿甘昺傳奉聖旨宣示御製原道辨一篇臣百拜展誦仰見聖學高妙留神帝王之道蓋無時頃不在其中此歷古帝王所甚難得者臣欽服贊嘆不能名言臣竊有愚鄙之見敢因具叙以裨光明緝熙之盛臣惟韓愈作是一篇唐人無不

敬服本朝言道者亦莫之貶蓋其所主在帝王傳道  
之宗其曰堯以是傳之舜舜以是傳之禹禹以是傳  
之湯湯以是傳之文武周公文武周公傳之孔子孔  
子傳之孟子此萬世不易之論原其意在於扶世立  
教所以人不敢議其後至於言有瑕疵則不可掩人  
亦以其所主在於扶世立教故亦從而恕之也然自  
唐以來言道者非不多獨陛下指其失如數黑白如  
辨一二昭昭然使人知其非者則陛下聖學可謂日

造於高明矣若夫融會釋老使之歸於儒宗則以五  
戒出於聖人之仁義禮智信三寶亦出於聖人之溫  
良恭儉讓是釋老皆在吾聖人度內不可別而為三  
一出於聖人大學之道也陛下末章乃欲以佛修心  
以道養生以儒治世是本欲融會而自生分別也盖  
大學之道物格而后知至知至而后意誠意誠而后  
心正心正而后身修身修而后家齊家齊而后國治  
國治而后天下平可以修心可以養生可以治世無

所處而不當矣又何假釋老之說耶陛下此文一出當與六經並馳於萬世須占得十分道理不可使後世之士議陛下復如陛下之議韓愈也臣是以拳拳之意欲望陛下稍竄定末章則善無以加矣臣狂愚之見既蒙陛下不鄙宣示不敢不盡乞陛下恕其僭越貼黃臣嘗謂唐人未嘗深造道蘊獨韓愈號為傑然者猶折佛老以渾吾儒他可知已今陛下心融意解會三為一非有卓然超詣之識豈能造此然臣之鄙



見以謂士之處世為其道不得行於時故不得已而後有言然所以起後世矛盾紛紛之論者因其言也若聖君達而在上所行所示無非是道又何假立言臣恐陛下此文一出天下後世有不達釋老之說而竊其皮膚以欺世誑俗者將撫陛下之言以為口實靡然趨風勢不可遏願少加聖恩姑緩其傳尤為幸甚臣荷陛下之眷異於常人所懷不敢不盡未知聖意以謂如何

論朋黨記所得聖語

淳熙五年五月七日宰臣史某奏臣去國十六年踰伏  
山林絕不與士夫往來今蒙聖慈俾再輔政人材能否  
不能周知雖加訪問未必能盡今在堂求差遣者數百  
人祇取已經堂除無過犯或有薦舉人先次授之或有  
過犯已復官改正及已曾經任未曾堂除人次之臣無  
阿私唯盡公道庶無朋黨之弊惟陛下加察上曰宰相  
豈當有朋黨人主亦不當以朋黨名臣下既已名其為

黨彼安得不結為朋黨朕但取賢者用否則去之且如葉衡既去人以王正己為其黨朕固留之以王正己雖衡所引其人自賢則知朕不以朋黨待臣下也臣浩奏陛下此心如止水如明鏡賢否皆不得遁故奸邪不敢名正人以朋黨漢黨錮唐白馬之禍皆人君不明為羣邪所惑遂致於此陛下今日之言豈不為萬世社稷無窮之福邪十一日臣浩等進呈七日宣諭聖語論朋黨事上曰唐文宗有言去河北賊易去此朋黨難朕嘗嗤

其言何至於此朋黨本不難去若人主灼知賢否所在  
唯賢是進惟不肖是退弗問其他則黨論自消漢唐末  
世朋黨皆數十年不能解以至禍亂朕嘗嘆之其患盡  
在人君之無學所以聽納之不明也若能公是公非惟  
理適從何朋黨之有哉使胷中有詩書有古今則朋黨  
何從而起臣浩等同奏陛下言及此萬世之幸臣浩奏  
用人惟論賢否則自無朋黨如唐牛李之事後之人  
謂德裕之黨多君子宗閔之黨多小人然德裕之黨豈

無白敏中之傾險宗閔之黨豈無周墀之直諒但於兩  
黨中用賢者黜不肖者則其黨自破聖諭深切誠古今  
不易之寶訓臣雄奏陛下聖謨及此真萬代人君之丕  
式漢唐之禍皆至亡國使當時人君能如陛下今日灼  
見此理雖至今存可也臣成大奏前代人主不惟不能  
去朋黨往往偏聽生閣反助成黨論以階禍亡未有如  
陛下學力高妙鑑自聖心逆折其萌甚盛德也漢唐史  
冊所載無此氣象當於前日聖語中增入以詔萬世上

曰漢唐朋黨之論大抵皆由主聽不明其原始於時君不好學臣浩奏說命三篇專論聖學如終始典學學於古訓之類帝王之要道無先於此上曰善十八日臣浩等進呈七月十一日聖語上曰前世朋黨之興盡由人主偏聽及黨論既成亦墮其中混而為一朕故推究源流以立此論卿等記錄詳矣朕觀漢唐之末時君心術不明又偏聽是非故奸臣得投其隙以立黨與遂成禍亂甚可憐也朕每讀前代史書至可喜處則欣慕之至

有不忍觀者則為之掩卷太息臣浩等同奏陛下聖學日躋一空前古天下萬世幸甚上又曰君子羣而不黨和而不同賢者自然以類聚雖曰羣曰和然自有不黨不同之處豈皆可指以為朋黨邪臣浩奏堯舜在位九官相遜文武傳國十亂同心謂之朋黨可乎臣等不肖方相與同心輔政事有是非可否往復評議各無纖芥形迹庶幾仰稱陛下無偏無黨之治臣雄奏人主之聽倘有所偏即所偏之處臣下必從而趨附之則黨與遂

成陛下謂朋黨盡由偏聽可謂深切著明臣成大奏陛下聖謨正大可以頒示臣庶使皆知天子不以朋黨待天下之士則孰不精白一心以承休德此誠希世之遇至謂黨論之起盡由人主偏聽有以致之則自古敗亂皆人主有以自取未可悉歸之天上曰朋黨之論不立則士大夫可以安心營職無他顧慮至於治亂禍福乃有不可盡言者蓋國之將興則有所謂天祐其衷否則有所謂天奪其魄天人之際甚可畏哉臣淮奏連日獲



聞史浩等修記聖語極論近世朋黨之弊深切闕大當  
與典謨並傳臣切自惟念三年待罪翰苑嘗因夜直宣  
召面奉玉音退與學士大夫傳誦莫不願究心滌慮以  
承休德繼典貢舉又嘗作為問目以策進士聞者莫不  
興起上曰向者與卿嘗及其畧故今樂與浩等論之臣  
淮奏仰惟陛下聖學高明見微知著故黨論自消由今  
觀三年前氣象固已不同況屢承面命夙夜儆敕何患  
治道之不進乎臣成大奏聖學緝熙可謂日日新又日

新矣天下幸甚

回奏宣示御製策士聖訓

朕觀劉光祖答策論科場取士之道前後論之者多矣  
皆未為切當今因論此一節極言其弊亦激士氣之一  
端爾夫近世取士莫若科場及至用人豈可拘此詩賦  
經義學者皆能為之又何足以分重輕乎夫科場之弊  
不精考文格之高下但以分數取之直幸與不幸爾至  
於廷試未嘗有黜落者盡以官資命之才與不才者混

矣是科場取士之本已弊也夫用人之弊人君患在乏  
知人之哲寡於學而昧於道況又擇相不審至於懷奸  
私壞紀綱亂法度及敗而逐之不治之事已不可勝言  
矣宰相不能擇人每差一官則曰此人中高第真好士  
人也終不考其才行何如孔聖之門猶分四科人才兼  
全者自古為難今則不然以高科虛名之士謂處之無  
不宜者何嘗問才之長短乎夫監司郡守係民之休戚  
今以資格付之宰相雖擇其一二又未皆得其人及至

陛對既無過人之善粗無凡猥之容則又未能極精其  
選國朝以來過於忠厚宰相而誤國者大將而敗軍師  
者皆未嘗誅戮之雖三代得天下以仁而啓誓六卿曰  
不用命戮於社羲和廢職猶且征之曰以干先王之誅  
況掌邦邑軍師之大事乎要在人君必審擇相必為官  
擇人不失其所長懋賞立乎前嚴誅設乎后人才不出  
吾不信也今朕延登二三柄臣皆精白一心盡忠無隱  
宜免乎此更勤夙夜益凝庶績豈不休哉

臣輒貢愚誠仰干天聽臣前日恭聞策士登瀛其間  
所答未甚痛快有御筆為之開明以宣示近僚臣深  
欲轉求竊窺聖作初三晚少保曾覲得旨過臣所居  
宣示此書臣百拜跪讀仰見陛下萬機之暇留神翰  
墨發為文章煥乎日進以起主威以勵頽俗不勝天  
下之幸臣嘗觀漢崔寔政論其言當世之弊救之之  
方無出剛果蓋自古聖君莫不以寬大忠厚為本而  
剛明果斷輔之今日王言之大雖不敢下比寔論要

其大旨亦是同歸誠欲振乾綱於委靡回既倒之狂瀾作羣臣以趨事赴功也抑臣觀聖訓謂將相有不稱職者欲誅戮之臣愚無知敢獻所疑夫唐虞之朝四凶極惡止於流放竄殛而其三載考績之法至於三考不過黜幽陟明而已未嘗有誅戮之科也若甘誓隋征所云乃為行師誓衆設耳蓋誅戮大臣者秦漢法也漢之七制可稱治主然見謂雜霸不得進於三代者此其大疵也我太祖皇帝深以行一不義殺

一不辜為戒而得天下制治以仁待臣下以禮列聖傳心至仁宗而德化隆洽朝廷之上至於恥言人過故本朝之治獨與三代同風此則祖宗之家法也而聖訓則曰國朝以來過於忠厚夫忠厚豈有過乎周家自后稷公劉太王王季積德累仁至於文武成康之盛而忠厚之風始達於天下故行葦之詩歌之夫為國而底於忠厚豈易得哉而豈有過者哉陛下此言垂之後世臣恐議者以陛下自欲行刻薄之政而

歸過祖宗此不可不審思也若必欲宣示於外乞改  
曰一於忠厚尚庶幾焉

從駕幸佑聖觀記所得聖語

淳熙己亥二月初吉駕朝德壽宮回鑾幸佑聖觀即上  
儲宮也上御講堂乃昔講讀之所浩從皇太子顧瞻棟  
宇初無改造儼然如新喜而念舊有旨召臣浩既至上  
曰朕去此十七年今得與卿等至此為豐沛故人之飲  
可謂盛事因使酌皇太子并臣浩等固辭乞先上萬年



之觴上飲醕舉杯宣示乃親酌酒次第賜臣等飲訖再  
拜謝上曰元良侍側保傅從游朕心甚樂上歡甚宣諭  
臣浩曰舊學甘盤豈無此作卿得見今日同享歡榮還  
歡喜否臣浩對曰臣榮幸有言莫喻然商高宗得道於  
甘盤是可謂之舊學臣備員獲事潛藩為日雖久無補聖  
明豈敢當舊學之名上曰經術之明忠規之切卿等宣  
勞朕自得之學實基於此固不可與俗人言也臣頓首  
謝酒數行上忽興曰同至明遠樓臣等從至樓下乃昔

燕射之地也上御坐命酒賜坐歡飲復數行上曰此地  
前有德壽宮可謂福地秦檜如何可當臣等曰興王之地  
豈臣下可得而居上顧謂皇太子曰近日資治通鑑已  
熟別讀何書對曰經史並讀上曰先以經為主史亦不  
可廢臣某曰太子天姿英特更常近儒生輔之以學問  
善無以加矣此社稷萬世之福也

鄧峯真隱漫錄卷十

欽定四庫全書

鄧峯真隱漫錄卷十一

宋 史浩 撰

進呈故事

唐太宗即位四年天下大治蠻夷君長襲衣冠帶刀宿衛薄海內南踰嶺外戶不閉行旅不齎糧取給於道帝謂羣臣曰此魏徵勸我行仁義之效也矣惜不令封德彝見之臣聞帝王之興所遭之時異宜所立之治異體

要皆胸中自有先定之規模是故下之所言上之所納  
千變萬化終莫能易其所守以規模先定也二帝三王  
不異此道故曰與治同道罔不興所謂道何道也仁義  
而已矣後世功利之說勝而仁義之治息非仁義不足  
用也不能以仁義存心而功利之說得以撼之也夫存  
心以仁義治雖未成一念潛萌冲和之氣已充塞乎宇  
宙由是而之焉則為帝王之隆平存心以功利事雖未  
濟一念潛萌怨讟之氣已充塞乎宇宙由是而之焉則

為戰國之權謀務先仁義功利隨之雍容垂裕其福無窮務先功利權謀隨之效攘爭取其禍有不可勝言者然則君之所以存心者可不審哉此有貴於規模之先定也唐太宗聽魏徵仁義之言如石投水無不契合行之果見其效說者謂徵詞旨剴切有以動帝心殊不知太宗胸中有先定之規模是以其言易入彼封倫何為者哉力以功利求勝仁義人主胸中無定論者固易欺也太宗可欺乎臣願陛下以仁義為規模先定於胸中凡

施為注措一以仁義為本本立則末自隨若舍本而從事於末則殆矣傳曰君仁莫不仁君義莫不義君正莫不正一正君而國定矣夫以仁義為本治定功成若此之易尚奚以權謀為哉太宗之治可謂得其要矣

唐文宗朝李德裕李宗閔各有朋黨互相擠援推排文宗患之每歎曰破河北賊易破此朋黨難

臣嘗謂堯舜當朝九官相遜文武傳國十亂同心未嘗聞有朋黨之說也朋黨之說其起於後世乎夫人

材之衆不能無賢不肖方以類聚物以羣分聲臭之  
同有不期合而合者而謂之朋黨則乾之飛龍在天  
大人不可以有造泰之拔茅連茹君子不得而在內  
可也文宗不思化此朋黨而欲破之宜乎其固結而  
不可解也夫破者必誅鋤根柢然後能絕至于化則  
賢者用使不肖者退聽不知其為誰之黨圓融和會  
消患於冥冥此人主御臣下之要道也且以文宗之  
世德裕宗閔各為一黨說者謂德裕之黨多君子宗



閱之黨多小人然德裕之黨豈無白敏中之傾邪反  
覆宗閱之黨豈無周墀之獨立不倚吾能於兩黨之  
中擇賢者用之則休戚不同進退以道自然破散不  
相為謀又焉有朋黨之迹哉然則化之破之其效不  
同如文宗不知出此切切然以為憂則唐室之不復  
振宜矣蓋君子小人固各有類然不可名其為黨名  
其為黨則君子熹於投合小人熹於朋比雖出一時  
之標榜不知其能貽萬世之禍也後之著論若歐陽修

司馬光等皆以為君子不能無黨夫既已名君子之類為黨矣小人安得不結為死黨求以勝君子乎黨既分矣於是君子進則小人退小人進則君子退陰陽消長否泰乘除二者若循環理勢之必然其不可破必矣唯不名其為黨則泯然無迹第見賢者用而不肖者斥耳本朝呂夷簡范仲淹蓋嘗有黨矣呂黨用則范黨不用范黨用則呂黨不用雖其後二臣交懽解難然朋黨之論終不能平至韓琦為相乃兩用

之其黨遂消夫以一韓琦尚然化其黨與使國家蒙  
萬世之福況以人主為之乎以是益知文宗徒興嗟  
惋之詞不得化之之道也

唐明皇時姚崇嘗於帝前序次郎吏帝左右顧不主其  
語崇懼再三言之卒不答趨出內侍高力士曰陛下新  
即帝位宜與大臣裁可否今崇亟言陛下不應非虛懷  
納誨者帝曰我任崇以政大事吾當與決至用郎吏崇  
顧不能重煩我邪崇聞乃安由是進賢退不肖而天下

治

臣聞古之帝王出而應世必以輔弼之臣為腹心者  
舜之禹臯陶湯武之伊周漢高帝之蕭曹孝宣之丙  
魏光武之寇鄧唐太宗之房杜是也蓋人君挈大器  
而欲置之治安之地非一人之力所能辦必寄之腹  
心之臣而自提其綱譬夫富商之運貨必使之負者  
負之而趨維持保護則在此而不在彼也苟欲身自  
負之行於夷途則可矣險阻崎嶇前有蹶跌後有遺

忘力或怠焉左顧右盼恐無肯任是責者何者素無委任之意其可以一旦責成乎哉明皇之用姚崇知此道也是故委任之意專而崇乃得盡其腹心進賢退不肖了無疑忌之嫌君臣之間可謂兩得矣或曰人主當總攬權綱豈應以權付宰相對曰若舜湯武高帝孝宣光武太宗豈不知治而必以權付諸子者知宰相之權重則朝廷之勢尊朝廷之勢尊則人主在上赫赫明明天下莫不知敬也然則以權付宰相而

總攬其綱亦人主自尊之道也明皇曰大事吾當與  
決豈非自提其綱乎至用郎吏則曰崇顧不能重煩  
我耶豈非以權付之乎摠攬之道明皇得之宜乎魏  
巍堂堂處三宗之一也

別擬

臣聞荀況有言曰主好要則百事詳主好詳則百事  
荒夫要者人主執其綱而百官有司各盡其職所以  
百事詳也若人主好詳則百官有司不任其責而人

主日不暇給矣是以書稱元首叢脞必繼之以股肱  
惰萬事墮不謂之荒而何譬之富商寶貨山積欲轉  
而之他必使有力者負之所謂富商者當徒手在旁  
維持覆護雖負者數百保其無遺忘矣若欲身自負  
之方且自顧之不暇焉能使數百人各盡其力哉何  
者不素委之臨時難以責其効力也明皇知此道者  
故曰大事吾與決豈非能執其綱乎至用郎吏必責  
之元宗況其小小者乎斷無好詳之弊矣開元之治

百度具舉井井不紊豈非好要之效歟太宗嘗謂房  
玄齡曰公為僕射當助朕廣耳目訪賢材比聞多閱  
於訟牒日數百豈暇求人哉乃勅細務屬左右丞大  
事關僕射且玄齡輔人主者耳太宗猶不欲以細務  
縈之則太宗所以自處者為如何哉好要之道太宗  
得之此貞觀之治所以巍巍堂堂與三代同風也太  
宗而下惟明皇知此其治之美幾於貞觀豈無所自  
而然哉



漢揚雄法言曰於戲學者審其是而已矣或曰焉知是而習之曰視日月而知衆星之賤也仰聖人而知衆說之小也學之為王者事其已久矣堯舜禹湯文武汲汲仲尼皇皇其已久矣

臣嘗謂大學之道明於帝王之世不明於漢唐之世明於帝王之世者堯以是傳之舜舜以是傳之禹禹以是傳之湯湯以是傳之文武周公文武周公傳之孔子孔子以是傳之孟軻其不明於漢唐之世者軻

之死不得其傳夫


大學之道何道也正心誠意而已矣蓋自正心誠意而學焉推而至於修身齊家治國平天下無所處而不當矣是道也堯舜禹湯得之謂之傳而不謂之學蓋其心心相授出乎自然高宗恭默得於甘盤天命傅說發明其說高宗獨能領解於是學之一字始大彰明周公孔孟乃專以是為設教之門故揚雄有見於此而宣言之曰堯舜禹湯文武汲汲仲尼皇皇學

之為王者事其已久矣於乎使周公孔子孟軻之教  
得行於中國後世聖明之王不恥於學者傳說倡之  
於前揚雄行之於後其有助於吾道不為小矣其開  
導於後世可謂切矣後世猶有自用之君矜其智力  
而不肯學自聖之君痼其鄙陋而不能學夫惟自用  
則惡忠言自聖則忌勝已其奔走先後皆讒諂面諛  
之人爾此帝王周孔孟軻之道所以不明於漢唐之  
世也其治豈無間有可喜要不純於正心誠意之學

也故韓愈號於世曰軻之死不得其傳斯言亦可悲  
矣恭惟太祖皇帝得天下如堯舜平禍亂如湯武文  
化如文王周公孔孟是以聖聖相傳心心相授皆出  
此道故能挈唐淺陋之習置之帝王周公孔孟大學  
之道也嗚呼盛矣太上皇帝得道在躬於干戈搶攘  
中崇儒右文統大學振乾綱於弛紐回既倒之狂瀾  
始克以此道傳之聖子陛下以天縱多能之聖緝熙  
光明之學承太上口授心傳之妙無一念不出於正

心誠意是故以之事天則三光全寒暑平以之事地則草木茂五穀熟以之事祖廟則神靈懽喜以之事兩宮則慈孝昭明以之柔遠方則向風慕義以之感人則天下和平此正心誠意之明效大驗也臣愚猶覬陛下研磨此學不倦以終之使其道高出堯舜之上以符孔子之所望夫學而至於堯舜至矣盡矣而孔子語博施濟衆之事修己以安百姓皆曰堯舜其猶病諸誠懼後世聖人學至堯舜而止也於是而

進焉大學之道也大學曰德日新日日新新不窮  
陛下之道將高出堯舜之上矣亦臣區區之願也



鄭峯真隱漫錄卷十一

欽定四庫全書

集部

鄧峰真隱漫錄卷十二

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

謄錄監生臣潘河



欽定四庫全書

鄧峯真隱漫錄卷十二

宋 史浩 撰

表

代林侍郎賀乾龍節表

祥開繞電式居維夏之辰情極望雲遙致後天之祝馳  
翠媯而莫及整丹悃以輸勤中賀恭惟孝慈淵聖皇帝  
睿智生知慈仁天縱屈萬乘之尊以全生靈億兆民之

衆衍一人之慶以續社稷二百年之基神物護持窮荒  
拱順渠撥野外行歸八駿之游花萼樓前佇上萬年之  
壽臣叨榮禁從退處宮祠徒瞻南極之明莫陪鼇抃尚  
俟東朝之闕得覲龍顏

賀天申節表

陽居大夏式臨誕聖之朝星拱北辰咸祝後天之算懽  
騰四海喜溢兩宮中賀恭惟尊號太上皇帝德邁古初  
仁均動植垂衣三紀孰窺造化之功脫屣九重高蹈希

夷之妙降年有永申命用休八千歲以為春已協莊椿  
之固七百年之卜世更綿周歷之長臣職奉祠庭身居  
里閭捧觴漢殿莫陪北闕之班矯首堯天第切南山之  
祝

有王者興已致昇平之治為天子父式臨誕育之辰萬  
乘稱觴羣王會弁頌聲溢于夷夏協氣滿乎乾坤中賀  
恭惟尊號太上皇帝大德動天至仁格物自謳歌之歸  
舜道得其傳致富之在堯尊無二上屆昌期於繞電

祝難老於後天臣頃自下僚驟蒙顯用懷恩未報勤香火以奉祠歸命尤虔望雲天而拱極

天開萬福運應千齡式臨繞電之辰用致呼嵩之祝中  
賀恭惟尊號太上皇帝量包萬有德合兩儀澤久寢於  
綿區人歌累洽道忽傳於聖子世樂重華玩意太清潛  
心衆妙百王莫及高風獨揖於陶唐萬壽無疆洪祚益  
過於邾鄆臣銜恩未報戀德方深誦天保之詩既專祝  
日想塗山之會更切望雲

得吾道而上為皇眇覲希夷之蘊有天下者尊歸父誕  
膺愛戴之誠敢因載夙之期躬致無疆之祝中賀恭惟  
尊號太上皇帝聖神廣運清淨無為厖恩滲漉於綿區  
盛治光華於汗簡寬仁大度垂漢祖之規模安樂延年  
邁周王之壽考神人溢喜夷夏同歸臣久遠清光坐糜  
榮祿昌期難遇適符流虹繞電之辰垂照無私敢罄就  
日望雲之意

律應蕤賓方帝舜歌風之日慶流華渚實皇穹降聖之

期動喜色於兩宮溢歡聲於四海中賀恭惟尊號太上  
皇帝沉潛淵默燕養希夷申命自天睿筭已隆於七袞  
大德得壽景命行卜於萬年適臨載夙之辰宜享無疆  
之福臣奉祠香火歸老山林北闕稱觴莫遙臣工之列  
南山祈壽徒歌天保之篇

帝乃誕敷文德已措國於昇平天其申命用休遂延年  
於安樂慶臨載育歡溢羣生中賀竊以佑民而作君師  
修政以撫億兆蕪懷南北卓冠古今自膺福報以無窮

故享壽祺而益遠恭惟尊號太上皇帝蒼旻饗道黃屋  
非心五百歲春五百歲秋閱靈根於南楚三千年華三  
千年實開皓宴於西池對茲震夙之辰宜戒簡穰之祉  
臣退藏田里寢遠闕庭會弁如星莫筵班於鵷鷺奉觴  
望日第馳頌於松椿

皇穹申命誕垂箕翼之光溥海儲祥更衍喬松之筭懿  
茲殊祉甫為昌辰中賀恭惟尊號太上皇帝德並兩儀  
治高千古撥亂世以反正獨致中興樂成功而不居躬

行內禪道傳聖嗣慶溢敷天載戢干戈六十年華戎兼  
愛盡闢農畝三萬里民物咸熙陰德既隆繁禧斯介幾  
閱蟠桃之華實益享大椿之春秋臣田里退休雲霄在  
望想漢廷之簪紱競集龍樓祝堯壽之岡陵徒深鼇抃

天開地闢篤生神聖之君治定功成退慕希夷之道式  
臨誕日彌溢歡聲中賀恭惟尊號太上皇帝德冠帝皇  
仁均戎夏撥亂反正復境土於雲擾之時垂拱無為措  
生靈於堵安之地宜有鴻雁之繁祉來符震夙之昌辰



臣賦質無堪蒙恩最渥已挂冠而歸里阻措筭以稱觴  
凝睇堯階既竭華封之祝服膺周雅更歌天保之詩

賀會慶節表

重明合璧遙聯析木之宮寶耀環樞早應猗蘭之殿歡  
騰寰宇喜溢宸闈中賀恭惟皇帝陛下睿智有臨聖神  
廣運日致其孝刑四海于一家天覆之仁子兆民於兩  
國茲屬誕彌之慶茂膺長發之祥臣秩視宰司躬逢聖  
旦仰瞻漢殿阻稱萬壽之觴願效唐臣敬上千秋之錄

會兩曜於析木之津愛紀誕彌之慶行萬壽於華封之  
祝茂昭歸美之誠式屆昌辰惟深善頌中賀恭惟皇帝  
陛下乾坤毓德海嶽儲休躬孝儉於一堂措昇平於四  
裔遂令寰宇載戢干戈生齒實繁孰不知於帝力年齡  
益富予以表乎天心既躋虞舜之垂衣永法老萊之戲  
綵臣自離魏闕久卧漳濱阻陪列辟之聯稱觴丹陛惟  
仰太陽之照傾藿青霄

佑下民而作君祥開陽月祝聖人而使壽情竭華封敢

伸報上之誠冀動蓋高之聽中賀恭惟皇帝陛下德符  
乾健治合離明下武繼文暢天威於有截重華協帝盡  
子道以無為氣屈嚴疑時當震夙咸賴一人之有慶共  
稱萬壽之無疆臣喜穀旦之初臨傾葵心而采切阻預  
臣工之列同奉稱觴徒歌天保之篇仰祈鴻筭

運際中興吉惟良月訂是穀旦篤生聖人載騰率土之  
歡庸介後天之算中賀恭惟皇帝陛下道高萬古德配  
兩儀法堯思之聰明懋禹躬之勤儉輯被休祥之証來

符震夙之辰瑞紀星躔燦長明之箕翼詩歌天保沸同  
祝之岡陵臣職奉外祠心馳內闕阻預稱觴之列第虔  
傾藿之誠

天開景命歷數綿於億萬年運際中興聖人生於五百  
歲式是載育之旦咸輸歸美之誠中賀恭惟皇帝陛下  
離德重明乾剛至健嗣堯廣運恭承濬哲之規纘禹美  
功坐享平成之效甫當良月茂屆昌辰璧月珠星炳光  
芒而薦祉冰天桂海駿奔走以來王沸北闕之簪紳歌

南山之松柏臣歸閒故里恩錫外祠萬壽稱觴莫預在  
廷之列一心傾藿惟知拱極之誠

龍飛得位一千載以題期虎拜揚休九五福而曰壽仰  
重明之麗正屬良月之就盈敢輸戀闕之忠敬上後天  
之祝中賀恭惟皇帝陛下誠參穹壤慶篤家邦德業山  
高而日昇號令風行而雷動盡循堯道禮樂著法度彰  
善繼文謨弓矢橐干戈戢當電繞虹流之節溢嵩呼鼇  
抃之歡臣蚤幸依乘晚方閒退雲霄在遠阻陪前殿之

稱觴溝壑未填惟頌南山而報上

作之君而作之師天心有在必得名而必得壽帝德罔愆爰屆昌辰虔申善頌中賀恭惟皇帝陛下誕膺駿命奄有綿區舞干羽于兩階蠻夷効順執玉帛者萬國華夏傾心既行勝殘去殺之仁斯得久視長生之道臣挂冠請老望闕馳神誦天保之詩敢忘歸美罄華封之祝少見輪忠

穹壤開祥天子建中和之極國家蒙福聖人綿福壽之

期式丁震夙之辰敢後升恒之祝中賀恭惟皇帝陛下  
道符乾健治繼離明冠孝儉於百王運武文於四海雲  
行雨施巍乎舜德之出寧日居月諸皇矣周仁之不冒  
宜鴻休之滋至介穀旦之初臨臣卧疾衡廬馳神楓陛  
君門甚遠第瞻北極以傾心睿算無疆更頌南山而歸  
美

燕謀紹慶肇開衍裕之祥虹渚流光愛紀誕彌之瑞  
惟穀旦同祝壽祺中賀恭惟皇帝陛下天縱聰明日躋

道德兼懷南北致三萬里之昇平並格高深享億千年  
之福祉臣念昔鳳龍之攀附惟今鹿豕之交游想漢殿  
之稱觴莫陪就日效華封而申祝唯誦後天

兩曜會于析木爰紀誕彌三呼起于嵩山是彰錫美慶  
均海宇喜溢親闈中賀恭惟皇帝陛下克紹丕圖誕膺  
景命得堯舜禹湯之純懿究詩書禮樂之精微心宅靜  
淵閱萬幾有神明之斷躬行仁義措一世登晏粲之塗  
式臨震夙之辰宜衍升恒之算臣蝸蟠里社鵠望天墀鬱



鬱葱葱徒想盈庭之佳氣穰穰簡簡第馳擊壤之歡聲  
正旦賀太上皇帝表

日匝經纏肇兩儀之交泰帝尊慈極觀萬宇之回春慶  
協神人歡均華夏中賀恭惟尊號太上皇帝詒謀燕翼  
玩意穆清俯授四時昔謹堯天之厯象仰齊七政今孚  
舜旦之璣衡甫臨獻歲之辰茂擁皇穹之佑臣乞身故  
里叨祿內祠莫隨未央殿之朝侑稱栢酒遙下大安宮  
之拜祈介椿齡

寶歷紀元載堯天之欽授玉卮奉壽洽漢殿之歡呼喜  
動寰瀛尊歸慈極中賀恭惟尊號太上皇帝詒謀燕翼  
契道希夷閱春秋於八千植基圖于億萬氣回暘谷方  
班象魏之和禮舉大安共上華封之祝臣夙蒙眷拔晚  
遂閒休歲序告新莫預稱觴之列雲霄在望徒傾戀闕  
之心

頌歷堯天喜青陽之應律奉卮漢殿祈紫極之齊齡慶  
行兩宮歡騰萬宇中賀恭惟尊號太上皇帝聖神廣大

道德希夷問之野問之朝咸知帝力得其名得其壽允  
協民心順迎開泰之三陽茂擁維祺之五福臣卧病故  
里阻覲嚴宸百辟雲從莫遙頌椒之列九重天遠第深  
傾藿之誠

正旦賀皇帝表

斗建璿杓肇紀萬年之厯天臨黼座誕膺四海之圖慶  
溢宸闈歡均寰宇中賀恭惟皇帝陛下乘離繼治出震  
握符道與時行順陰陽而育物德侔乾健體中正以宜

民甫臨獻歲之辰茂擁皇穹之佑臣叨分外服阻覲清  
光瞻彼闕庭靄非霧非煙之氣祝吾君壽賦如山如阜  
之詩

歲之朝月之朝肇開萬紀天所助人所助咸萃一人  
百福是道四方來賀中賀恭惟皇帝陛下乾坤合德日  
月並明欽福錫民恩既隆於左右對時育物道更妙於  
財成茲茂履於三陽宜誕敷於多祉臣身逢盛旦職係  
齋庭北闕稱觴雖莫陪凡百執事南山祝壽徒能歌於

萬斯年

在璿璣以齊七政肇序三陽執瑁圭而朝諸侯斂時五  
福尊歸震極慶浹寰瀛中賀恭惟皇帝陛下接統循堯  
履端行夏嗣休明於寶厯頒正朔於路朝羽葆歲蕤親  
奉慈闈之壽丹墀拜舞歡傳嵩岳之呼臣遭承平乞  
身閒退稱觴穀旦莫陪漢殿之儀向日葵心惟效華封  
之祝

法嚴五始仰明聖之體元序正三陽慶乾坤之交泰惟

皇建極斂福錫民中賀恭惟皇帝陛下申命自天重華  
協帝省歲時而不忒嗣歷服以無疆燕寢鷄鳴奉親歡  
於億載龍墀振鷺藹和氣於千官臣屏處田閭逖達軒  
陛香飄合殿莫綴武於槐楓日近長安徒傾心於葵藿  
冬至賀太上皇帝表

陽氣潛萌於泉應七日之來復聖人退藏于密觀萬物  
之資生慶溢慈闈和薰廣宇中賀恭惟尊號太上皇帝  
道高太極德冠百王舜子丕承爰釋鴻圖之負堯天難

老載迎鳳歷之長茲茂對於昌辰宜倍膺於純嘏臣領  
祠京邑歸築山樊莫隨漢殿之奉卮歡呼為壽第祝周  
家之定鼎安樂延年

氣復黃宮茂對物滋之始祥開紫殿寅賓日至之長中  
賀恭惟尊號太上皇帝措世昇平凝神清穆適臨慶旦  
翁受繁禧鳳駕來朝雲擁充庭之鵷序獸爐深炷煙濃  
滿袖之龍香臣恩許歸鄉病難趨闕莫與稱觴之列徒  
懷傾藿之心

魯觀瞻天式紀五雲之瑞堯宮望日喜添一線之長運  
偶明時尊歸慈極中賀恭惟尊號太上皇帝心游淵默  
道契希夷成功高蹈於羲皇丕緒親傳於舜子對新陽  
之來復茂景貺之攸崇壽舉玉卮慶延寶曆臣乞身軒  
陛謝事丘園挂神武之衣冠莫與稱觴之列仰大安之  
牆宇徒深戀闕之誠

叢霄效瑞彩毫已布於五雲麗日流空繡閣初添於一  
線既體純乾之剛健宜膺來復之吉亨普率騰歡神祇



薦祉中賀恭惟尊號太上皇帝道超古昔志契希夷黃  
屋非心堯帝欽明而克遜靈臺在錫武王安樂以延年  
式丁亞歲之臨斯衍繁禧之錫臣屬歸田里已挂衣冠  
漢殿伸儀莫遙鴻鴻之列華封請祝敢輸葵藿之誠

冬至賀皇帝表

月吉頒常位正臨於平朔陽來協序氣潛兆於黃鍾喜  
溢神人慶流宗社中賀恭惟皇帝陛下誠參造化道覆  
華夷健德時行幹三微於天統神功默運錫五福於民

編坐迎日至之長茂擁川增之祉臣夙叨近列幸際昌  
辰奉萬歲之觴莫遙金闈之彥瞻五雲之瑞遙知玉燭  
之和

玉歷頌冬肇太和於天統璿杓建子迎至日於箕躔萬  
寶向榮四方來賀中賀恭惟皇帝陛下德侔乾健治對  
離明體道冲虛以待陰陽之定觀時消長默傳天地之  
心茂臨復旦之長坐擁泰亨之祉臣夙叨邇列忻際昌  
期嶽抃嵩呼遙祝萬年之壽珠連璧合永觀七政之齊

氣轉洪鈞應嶰筩而來復君臨紫極舒寶曆以迎長慶  
洽三靈歡騰萬宇中賀恭惟皇帝陛下受堯一道協舜  
重華探端天統之微幹旋妙造體德乾元之大發育含  
生履茲至日之亨益茂閔休之對臣進蒙舊眷退奉內  
祠雖違咫尺天威身居綠野唯上千萬歲壽神詣丹墀  
律應黃鍾登魯臺而紀瑞祥開紫極嗣堯曆以迎長新  
陽初肇於地中和氣潛回於宇內中賀恭惟皇帝陛下  
對時育物正事承天當七日來復之期膺萬壽無疆之

祉鳴鑾夙駕玉卮前奉於親歡法座昕朝金鑑式裒於  
輿頌臣屏居田里待盡桑榆賸節令之推遷念江湖之  
逾遠職叨三事莫陪拱北之班情戀九閭第切維南之  
祝

律應陽來式驗琯灰之動日行南至喜添宮線之長媚  
茲一人敏時五福中賀恭惟皇帝陛下道闡百聖德合  
二儀建皇極以錫民撫庶邦而來享中嚴黼座已班垂  
拱之朝前奉玉卮復上大安之壽臣位叨三事身遠九

閣稱觴莫綴於鵷行戀闕敢伸於燕賀

玉琯飛灰喜初陽之溫厚銀臺觀稔見瑞氣之氤氳作  
善降祥以時受祉凡居生息罔不忻愉中賀恭惟皇帝  
陛下道與天通政由德發體兩儀之大造物各得宜洽  
四表之懽心人皆知孝屆茲亞歲茂擁殊禧臣解組歸  
田望雲擊壤千官會弁想花覆於彤墀萬壽稱觴徒心  
馳於華闕

鄮峯真隱漫錄卷十二

欽定四庫全書

鄧峯真隱漫錄卷十三

宋史浩撰

表

代宰臣等賀雪表

寒籥適中庶物方希於膏潤同雲密布飛霰欵散於瑤  
空祥發上穹歡騰率土中賀恭惟皇帝陛下淵源體道滲  
漉敷恩膺寶曆之延鴻格綿區之泰定以誠育物而有

生咸遂以德參天而無感不通三登曲軫於清衷六出  
遽呈於上瑞始由霰集表薦至之珍符旋使晁消滋橫  
流之叶氣盡祛瘴癘廓示祺祥臣等贊化徒勤調元無  
補慶豐年之多忝多稔茲幸有期誦天保之如岡如陵  
第知歸德

賀郊祀大禮慶成表

熙事告成格聖人之能享靈心允協表上帝之居歆霈  
澤無垠普天同慶中賀恭惟皇帝陛下紹堯正統繼禹



神功惟德可以動天惟誠可以尊祖乃乘長日之至適  
奉圓丘之禋四海之助皆來諸福之物畢至精誠上達  
高厚咸孚臣屬染沈痾莫陪顯相口誦思文之頌徒仰  
縟儀心存天保之歌敢忘美報

泰壇躬祀肆蒐舉於上儀燿火告成用靈承於景貺福  
均海宇慶溢神人中賀竊惟自昔聰明齊聖之君克謹  
寅畏欽崇之禮雖三年大報於昭享帝之誠而萬國駸  
奔且嚴尊祖之義靈心允協昨福無垠在振古以如斯

于清朝而大脩恭惟皇帝陛下誠參化育道格堪輿  
時福以錫民默膺帝賚建大中而立極仰當天心屬當  
陽至之辰虔舉國南之祀鳴鑿清蹕紛協氣之鼎來燔  
燎升煙耀神光之饗答精禋上格聖澤滂流臣叨奉殊  
庭阻陪行闕幸天子親郊之盛遙想祲容歌昊天成命  
之詩第勤善頌

賀明堂大禮慶成表

奉路寢之明禋聿成熙事敷端闈之大號允答歡心凡

在照臨舉增忻躍中賀伏以天地眷我有宋歷數在于  
上躬九叙惟歌百神受職維時宗祀蔽自聖心被黷享  
帝之誠稽用當郊之歲神靈感格有司告牲幣之虔躔  
度昭回太史奏房心之應功光在昔燕及無疆恭惟皇  
帝陛下受命溥將宅心寅畏郤金芝朱草非常之瑞惟  
專意於豐年抑玉闕青海不世之勳方力修於文德至  
於延登耆雋以共承祀事親御赦令以蕩滌疵瑕豈惟  
闡皇祐之彌文予以繼昭興之鴻烈臣久違睟表適困

沈疴身在江湖阻，遙駿奔之列職。非岳牧莫踰宣布之，勞徒有精神尚馳夢想。

賀改元表

隆興改乾道

卜郊成禮已膺帝眷之博，臨霈赦紀元更合乾陽之行。健命行萬國風動四夷，凡曰有生孰不同慶中賀恭惟。皇帝陛下惟天合德與物為春，符景命以長年肆隆恩。而改號一新觀聽永底昇平，臣荷寵至深奉祠在遠稱觴介壽莫陪同德之三千拜，手祝君願過卜年之七百。

冊皇后賀皇帝表

景運無疆徽音有嗣諏靈辰於太史授寶冊於中宮廟  
社益昌人神胥悅中賀臣聞義皇畫易卦始乾坤孔子  
刪詩風先周召蓋夫婦者人倫之本而后妃為王化之  
基不資內助之賢曷致太平之美恭惟皇帝陛下治方  
稽古法務齊家念天尊地卑道貴陰陽之相濟而日晝  
月夜職當內外之兼修肆因筮筮之祥肇正軒星之象  
豈止奉上皇之志丕顯孝恭又將格庶國之心潛消怨

曠禮成一代慶衍億齡臣夙荷厚恩忻聞盛事既阻舉觴而稱壽徒深向日以馳誠

冊皇后賀太上皇帝表

燕處穆清堯帝方隆於富壽儲精蠖護虞皇遂享于謳歌肆因龜筮之祥肇正椒房之禮共知盛舉發自淵衷慈訓一頌普天同慶中賀臣聞在昔君人之道率隆王化之基詩美周南蓋先正始書陳媯汭實本明倫矧聖人之當陽方宸心之廣孝奉烝嘗於九廟致溫清於兩

宮豈使內朝尚茲虛席迺敷綸綍庸錫禕褕非繇睿斷  
之施孰使縟儀之講恭惟尊號太上皇帝道高萬古勲  
格三靈黃屋非心宏離明而繼照彤闈著德啓坤順以  
承天父父子子而德教興夫夫婦婦而家道正播之寰  
海式是儀刑臣久荷生成偶居遠外逖聞慶事采激懽  
悰莫陪百辟之班奉觴北闕虔祝九重之壽矯首南山  
皇后受冊禮畢賀皇帝表

乾德光亨既推恩於四海坤元效法爰正位於中宮冊

寶備成華夷胥慶中賀臣聞若稽盛世必使齊家惟茲  
王化之基允屬聖朝之舉恭惟皇帝陛下德隆萬古道  
格三靈念紹寧於家邦宜欽承於宗祖祗服尊親之訓  
肆登淑哲之英國典既行母臨斯慶臣比叨祠祿正遠  
朝班阻就列以歡呼徒馳神而鼓舞

皇后受冊禮畢賀太上皇帝表

帝尊慈教庸建椒房使奉明綸榮將寶刻禮成邃密慶  
溢邇遐中賀恭惟尊號太上皇帝德合高穹心游太古



道傳聖子既安樂以延年治本齊家俾雍容而求配玉  
音誕布海宇咸聞洎茲冊寶之頒允協著龜之吉臣蚤  
蒙識擢乞遂叨踰天地隆恩念捐糜而莫報國家慶事  
第鼓舞以增歡雖阻稱觴尚期擊壤

皇孫生賀皇帝表

聖政清明共仰龍飛之旦天孫赫奕肇開熊夢之休海  
岳謹呼華夷鼓舞中賀恭惟皇帝陛下道參三極仁覆  
八紘言舉斯心胡越等一家之視既受帝祉本支延百

世之祥九廟垂休而載寧兩宮動色以相賀臣奉祠在  
遠旅進無階披仙源積慶之圖益增盛大知帝歷卅年  
之數永底靈長

皇孫生賀太上皇帝表

上德無為神方融於道妙太和所格慶已肇於皇孫喜  
氣浮天歡聲動地中賀恭惟尊號太上皇帝沈潛淵默  
燕養希夷功成不居力解萬幾而退佚德施者博戲觀  
四世之儲祥壯佳氣之鬱鬱蔥蔥大靈源之繩繩揖揖

臣奉祠香火歸老山林北面稱觴阻筮鷄行之後南山  
祈禱徒深猷舞之誠

立皇太子賀皇帝表

誕敷寶冊肇建儲闈九廟神寧得震亨之主罷兩宮色  
喜見離照之重熙遐邇攸同歡愉靡極中賀臣聞太微  
有爛光賁前星巨浸方深波分少海惟立天下之本始  
知帝者之尊恭惟皇帝陛下濟衆以仁悅親有道際天  
極地咸蒙覆育以生全問寢承顏斯得元良而為助慶

綿丕祚澤浸多方臣叨竊祠廷踰藏里閉莫陪簪履瞻  
三善於東宮第指岡陵祝萬年於北闕

立皇太子賀太上皇帝表

聖主虔尊於慈訓誕告庭紳皇孫肇正於儲闈茂彰國  
本歡均海宇喜溢天顏中賀恭惟尊號太上皇帝順物  
自然體天行健非心黃屋既隆與子之光屬意青宮益  
顯詒謀之遠是宜安樂永介壽祺臣夙荷生成逮茲閒  
退與觀典冊班莫造於鸞鸞遙睇雲天心實傾於葵藿

皇太子受冊禮畢賀皇帝表

蒼龜協吉既備禮於龍廷金玉其章遂增光於鶴禁慶  
隆宗社歡洽寰區中賀竊惟隆盛之朝必重元良之舉  
承祧貳極衍列聖之宏休監國撫軍係萬方之重望非  
由獨斷曷底慶成恭惟皇帝陛下以德行仁繼天作主  
明離普照上承堯帝之傳洵震襲亨下有文王之子是  
行緝禮茂鬯鴻私臣久荷聖恩叨居祠祿奉觴北闕莫  
隨百辟之班矯首南山第祝萬年之壽

皇太子受冊禮畢賀太上皇帝表

帝遵慈訓肇啓儲闈國有徽章肆頒顯冊禮成邃密歡  
動邇遐中賀恭惟尊號太上皇帝德格三靈道高萬古  
位傳聖子視黃屋而不居慶衍孫謀俾青宮之預建神  
寧宗社澤被軍民共知國本之不搖率自聖謨之蚤定  
舉難逢之盛典幸親見於熙朝臣叨奉祠庭阻趨天闕  
卜年卜世將期過歷於周家重光重輪願繼歌詩於漢  
室

加上太上皇帝太上皇后尊號賀皇帝表

鳳歷綿延申錫慈闈之慶鴻名昭揭聿觀鉅典之成亘  
隆古以罕聞整寰區而交并中賀竊以肅清朝五日之  
駕禮具漢皇奉廣殿萬年之觴制存唐世未有天畀無  
疆之算身都甚盛之稱縟儀並舉於嚴君聖治誕敷於  
率土雖大德必得名位式介壽康繇一人克致愛欽實  
昭眷賚恭惟皇帝陛下躬行舜孝思廣文聲凡侍膳問  
安已篤勤於尊養謂備道全美宜曲盡於形容屬當希

有之年再講惟新之禮光騰玉冊煥顯號之穹崇喜入  
楓庭想慈顏之怡懌天人允答宗社增輝臣叨奉外祠  
欣逢盛際詔多方揚明命一時已播於綸音將四海奉  
雙親萬壽願符於聖製

賀太上皇帝加尊號表

帝齡時億甫登希有之年寶冊煥揚申講非常之典歡  
騰四海慶溢兩宮中賀恭惟尊號太上皇帝道契古初  
仁均覆載垂衣蠖濩治隆三紀之餘脫屣崇高妙出羣



物之表備極一人之孝養居全五福之壽康雖功藏諸用莫得以名言而德在於今自形於歌詠肆因穀旦肇顯鴻猷合十六字之徽稱為天子父乃貴耳整億兆民之虔祝使聖人壽何辭焉祈睿算之益隆佇曠儀之屢舉華夷愛戴宗社尊榮臣叨奉殊庭欣逢盛事誦蕩蕩巍巍之德已在堯舜先祝高高厚厚之期當與天地並  
太上皇帝太上皇后慶壽禮成賀皇帝表

慈極儲休慶修齡之希有春期介壽覃曠澤之無垠整

海縣以嵩呼企雲天而鼇抃中賀臣聞聖德無加孝天子必有尊彼漢宮置酒之辭止在一堂之上逮唐殿品嘗之制徒夸兩膳之間曾未必若愛欽曲盡於宸旒名壽並膺於寶策既衍嚴君之祉復均率土之歡在昔未聞于今創見恭惟皇帝陛下道隆堯舜行過閔曾方問寢龍樓三日安而乃喜雖垂衣黼宸一舉足而敢忘老吾老以及人親其親而錫類嗣上帝無疆之歷躋重闡有永之年茂對新祺爰敷顯渥縟儀鉅典極聖志之尊

崇厚德深恩霈寰區而浹洽凡居壽域悉蔭洪禧臣叨  
奉殊庭欣逢盛旦九重絳闕遙瞻佳氣之鬱蔥萬歲玉  
卮想見慈顏之怡懌

賀太上皇帝慶壽禮成表

萬壽維祺喜乃躋於七袞一人有慶爰忻奉於兩宮當  
青律之始春適皇家之成禮恩覃廣宇歡溢慈顏中賀  
恭惟尊號太上皇帝玩意希夷凝神蠖濩奮少康之一  
旅馴致中興舞虞舜之兩階實由蕪愛豈惟中原不識

兵革抑使異域咸冒幘蒙黃屋非心既從容而與子蒼  
旻降祐遂安樂以延年已隆寶冊之徽稱宜介玉卮之  
眉壽臣生逢盛事跡阻外祠瞻絳闕之峒堯蔥蔥鬱鬱  
祝青宮之衍裕簡簡穰穰

冊皇后賀皇帝表

渙號揚庭坤儀正位自天立配雖稽用於舊章養志承  
顏宜進登於淑德事關國體慶浹民編中賀竊以自昔  
憂勤願治之君必求儆相成之佐非特巖宮中之軌

則蓋將示天下以儀刑屬我熙朝克修盛典恭惟皇帝  
陛下治方稽古法務齊家念天尊地卑道貴陰陽之相  
濟而日晝月夜職當內外之兼修爰稟訓於慈闈俾肇  
開於彤禁行見人倫之正益隆王化之基臣久去軒墀  
恭聞綸綍詠二南之德徒景行於周詩上萬年之觴阻  
隨班於漢殿

冊皇后賀太上皇帝表

中闈肇建益隆王化之基顯冊誕敷實稟慈皇之訓事

闕宗社喜溢人神中賀臣聞三代之興式資內助二南  
之化用正人倫矧聖子之當陽推誠心而廣孝入則謹  
兩宮之溫清出則嚴九廟之烝嘗豈使內朝尚茲虛席  
爰頒綸綍用錫禕褕豈惟緝典之聿修悉自淵衷之獨  
斷恭惟尊號太上皇帝勲高萬古道配二儀陳紀立經  
垂漢王之制度齊家治國表周后之儀刑遂令海宇之間  
均被乾坤之德臣逖聞慶事偶奉外祠百拜稱觴莫造  
鵷鴻之列寸心賀履敢馳燕雀之誠

皇后受冊禮畢賀皇帝表

乾德當陽既推恩於四海坤元效法爰正位於中宮慶協  
蒼龜光騰冊寶中賀恭惟皇帝陛下道隆萬古德邁三  
王謂外順悉本於內和而家齊可臻於國治乃遵慈訓  
肇建長秋豈特克正柔儀化天下以婦道又將上毗孝  
治合萬國之歡心惟慶禮之告成溢寰區而交抃臣夙  
蒙異眷嘗玷通聯身卧漳濱莫筮在廷之列心存魏闕  
第馳賀履之誠

皇后受冊禮畢賀太上皇帝表

帝遵慈訓肇起椒房國有徽章肆頒玉冊禮行邃密慶  
溢通遐中賀恭惟尊號太上皇帝燕養希夷沉潛淵默  
道傳聖子既安樂以延年治本齊家俾雍容而立配詔  
音誕布海宇交欣迨茲寶刻之成允協元龜之吉臣蚤  
蒙識擢迄遂叨踰天地隆恩念靡捐而莫報國家慶事  
第鼓舞以馳誠

太上皇后慶壽禮成賀皇帝表



致養嚴宸方介彌高之祉儲祥慈極更躋希有之年慶  
展九重恩均萬國中賀恭惟皇帝陛下道隆堯舜行過  
閔曾問寢龍樓三日安而乃喜垂衣黼辰一舉足而不  
忘適當喜懼之秋彌謹晨昏之奉南山栢茂上皇正行  
於億齡北內椒馨壽母又臻於七袞嗣萬世无疆之歷  
燕兩宮有永之祺爰即新春慶成縟禮遂令四海咸登  
仁壽之途端在一人克盡愛欽之道歡騰率土德格皇  
天臣猥以負薪措於就日苞苴鬱鬱望漢殿以輸誠簡

簡襮襮罄華封而致祝

太上皇后慶壽禮成賀太上皇帝表

北內兩宮茂喬松之偕老南山萬壽喜祺翼之交輝彤  
闈躋七袞之祥丹宸富九重之樂歡均率土慶溢敷天  
中賀恭惟尊號太上皇帝道並堪輿德隆今古爰非心  
於黃屋久玩意於紫清六十年不試兵戈實由蕪愛億  
萬人皆興禮遜本自移風陰功既冠於百王純嘏宜膺  
於萬歲遂同椒壺並介春齡涓穀且於始春舉縟儀於

曠典光華寶冊紀太姒之徽音激濫玉卮洽上皇之歡  
意臣棲身在外伏枕未瘳祝獻華封阻筵鵷鷺之列頌  
馳天保徒懷葵藿之心

太上皇帝慶壽禮成賀皇帝表

太極儲祥如遇常珍之歲三朝介祉更覃綿宇之恩合  
中外以嵩呼企雲天而螯抃中賀臣聞二帝之盛享祚  
獨高三王之隆得年有永降及中古迄于當今允惟太  
上之至尊獨備廣成之大道非心黃屋玩意紫清日月

緩行方彭祖十分之一春秋益富過莊椿百倍而多聖  
算無疆宸衷以喜恭惟皇帝陛下資齊堯舜行過閔曾  
問寢兩宮克盡南陔之養均歡四海又誦蓼蕭之詩至  
德上際而下蟠休聲風行而雷動臣未遵聖訓快覩綈  
儀漱澁玉卮慶慈顏之怡懌岩堯金闕靄佳氣之氤氳  
普暨蒸黎同躋仁壽

高宗皇帝加徽號上皇帝表

辛亥十一月

則天蕩蕩固靡俟於形容成功巍巍宜不忘於揚厲式

昭祖武允屬孫謀神人悅怡夷夏鼓舞中賀竊惟洪荒  
之上聖賢著無諡之文治古以來子孫有稱美之義雖  
太平無象難施繪畫之工而大德得名實貴光昭之舉  
原于歷代盛在熙朝恭以高宗徽號皇帝配天受命奮  
一旅以極中興撥亂興衰叙九疇而建皇極全功兼創  
業守成之績至德盡郊天告廟之誠翰聖神變化之機  
備文武弛張之道人和致順蓋止于仁地察顯靈實根  
於孝皆生知之固有匪溢美之虛言肆加十字之徽稱

雅出大君

壽皇表  
云兩宮

之英斷典冊焜煌於億載神靈歡喜

於九霄一札初頒萬方咸服伏惟皇帝陛下聰明作后

睿智有臨重舜之華惟務悅親而有道襲堯之爵故知

尊祖以為先懿此縟儀叶于慈抱泥金檢玉重增九廟

之光疊矩重規高掩百王之躅臣伏限退休田野莫遑

趨慶闕庭臣無任

云云

鄧峯真隱漫錄卷十三

欽定四庫全書

集部

鄭峰真隱漫錄卷十四  
五

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

謄錄監生臣潘可

欽定四庫全書

鄧峯真隱漫錄卷十四

宋 史浩 撰

表

代人謝除知明州表

違從臣之荷橐僅十八年奉使郡之竹符無二三舍曾  
謂民社蕃宣之寵猥先江湖流落之餘仰獨斷以天臨  
俯孤蹤而涕賈中謝伏念臣蚤由末學濫綴名流寢逢



神聖之知獲侍清閒之宴恩隆未報罪大不容顧投閒  
置散分之宜而附熱趨炎心所鄙甘奉身而退縮將  
沒世以湮沉敢謂天地之洪私俯紀蓋幃之舊物乃分  
印綬俾奉教條矧四明庶富之邦實三韓扼控之地鬱  
為輔鎮密衛宸庭尚容衰晚之資叨奉光榮之寄茲蓋  
伏遇皇帝陛下乾剛善斷哲鑒惟明察臣下之勤勞審兇  
邪而拔去滯淹並起一新寬大之恩幽遠不遺盡革詆  
誣之俗致茲孱瑣亦出照臨臣敢不虔奉君仁力蘇民

隱不為日暮途遠自渝葵藿之心雖云海闊山崇當竭涓塵之效

代司業謝誠諭表

率屬四門謬於考擇敷綸九陛賜以丁寧仰銜善貸之恩俯積素餐之愧中謝伏念學雖為已識不無人偶逢神聖之知寢歷清幽之選叨從省戶濫貳賢闕既不能使官僚皆擅精詳之舉又不能令士子各安義命之歸每興洶洶之風波有負堂堂之庠序且一時過設固云

師不必賢而衆口沸騰是亦齊未為得致勤聖慮俱肆  
德音使當汰斥之流並入矜容之內恩隆天地報乏繄  
毫茲蓋伏遇皇帝陛下德底日新聖惟天縱邁能官之  
棧樸體樂育之菁莪憫茲臣下之過愆撫以訓詞之溫  
厚俾從今始漸復古初臣敢不仰戴至仁益虔厥職拔  
尤取穎思服衆以為先摩義漸仁惟敗羣之務去誓將  
薄效仰答弘私

代叔父謝除諫議大夫表

聖恩至渥輒貢懇辭天聽蓋高莫回成命循涯涼薄拜  
寵驚惶中謝竊以在昔帝王率隆諫諍雖明良之相遇  
猶叢脞以申規用成濬哲之資以廣雍熙之化顧茲要  
職宜選名流如臣者蓬華孤寒桑榆衰晚生遇聖神之  
世誤蒙特達之知帝幄侍言延英抗論驟令叨預誠出  
遭逢當明主已躋三代之隆使微臣遽處七人之首銜  
恩雖寵非據為憂茲蓋伏遇皇帝陛下聰以作謀知而  
則哲日新其德學益際於淵微時敏厥修謀使陳於忠

謹每由言路進擢從臣致此妄人亦叨異數臣敢不兢  
兢守職審審持心期輸葵藿之微仰奉乾坤之大

代叔父謝簽書樞密院事表

綸音薦錫渙命莫回祇受以還震驚無措中謝竊惟黼  
帳本根之地是謂清朝宥密之司非資全文武則孰裨  
末議於廟堂非識洞猷為則孰貳洪樞於造化自知衰  
謬敢望寵榮遽此叨踰靡容辭避茲蓋伏遇皇帝陛下  
堯仁廣被舜智博通以不貳而任賢由至公而作哲宣

明人主之職興起太平之功復謹選於庶僚俾協圖於  
密席擢茲孤跡置在邇班景迫桑榆敢銜精神而矍鑠  
心非木石誓將頂踵以捐糜

代叔父謝蕪權參知政事表

由衷之懇屢瀆天聰從欲之仁罔回聖造拜恩益寵撫  
已惟憂中謝臣竊以在昔聖朝必先治體惟君臣之咸有  
德故名器之不假人使庶恥之俗成由奔競之風息茂  
昭此道允屬今辰矧政事之本在於尚書而奉行之際

尤須丞轄宜得詳明之士可為僚寀之光遽使瑣材實  
當牢避誠恐累大公之化蓋非規小僅之名仰被敷綸  
迄無反汗望非愚及榮與懼并茲蓋伏遇皇帝陛下堯  
禹凝勲成康躋治職論一相善取諸人既令朝夕納誨  
以輔台又欲左右之臣罔匪正致茲朽質濫廁邇班臣  
敢不退揣初心仰銜大賜誓殫蜂蟻之素仰答乾坤之  
私

代叔父罷政宮觀表

譴薄微資弗勝重任飄零末路尚畀貞祠罪大恩隆感  
深涕落中謝伏念臣性鍾朴野家積單平徒為章句之  
腐儒謬綴簿書之俗吏分無榮望老在窮途豈期明良  
相遇之朝遽進遲鈍不及之士曾未閱歲已處近班始  
長七人繼登二府仰止山淵之大實無涓滴之勞豈惟  
資望素卑世所不許抑亦禍災自取人亦喜攻罪雖徹  
於聽聞恩必歸於寬恕俾尸祠祿得見鄉闈惟天地之  
施生以收成為至德惟神聖之選擢以保全為大恩幸



既不貲身何以報茲蓋伏遇皇帝陛下堯神廣運湯德克寬察臣下之勞動審凶邪而拔去尚榮以祿俾盡其生臣敢不益念昨非深勤內省景臨西崦知來日之無多感在中扃誓此生之不替

代宰臣等謝賜喜雪宴表

朔雪效祥俯應一人之德需雲命燕肆頒百體之延誤被恩華靡勝悸忭中謝伏念臣等猥緣遭遇獲玷使令叨預近司曾蔑經綸之效克成美化初非調燮而然歲

方半於三冬月適丁於再閏飛珍萬宇既成璧以為珪助  
順九重本日暘而月雨退惟尸素增靡涓塵方深芒負  
之虞更沐燕胥之惠茲蓋伏遇皇帝陛下恩覃動植道  
格天淵窮幽極遠而鬼神不遺摩義漸仁而華戎咸服  
兆此豐穰之瑞表夫誠恪之孚猶示謙冲特彰眷渥亟  
奉天顏之喜俾參醉弁之峩耳聽韶音頓覺非常之遇  
心銘湛露難忘欲報之私

謝除中書舍人表

諸闡肇建已叨左史之榮邦命維新復陟西垣之峻荷  
恩加厚懷愧彌深中謝伏念臣頃事潛藩獲塵講席仰  
觀舜問每究天人之微退誦堯言預知宗社之福而臣  
文辭鄙淺論議闕疎徒親咫尺之光莫致涓埃之助敢  
圖簡記曾不瑕疵遺簪念舊而見收自知無用積薪後  
來之貽諂終懼難安踏地固辭籲天弗獲此蓋伏遇皇  
帝陛下鴻慈委照大度包荒念臣久侍燕閒當粗知於  
德意謂臣素懷朴直宜不昧於私心擢自羈單置之嚴

近臣敢不勉修薄技益勵孤忠潤色皇猷雖有慙於亟  
亟論思庶政尚少見於惓惓

謝蕪侍讀表

內史贊書方重非材之愧邇英進讀更叨躡等之除拜  
命若驚拊躬無措中謝臣竊以帝王之學異夫章句之  
儒自誠而明惟睿作聖上稽治古下繹庶言當得魁傑  
耆老之臣共致廣大精微之助豈伊孤陋亦與選求茲  
蓋伏遇皇帝陛下富高宗之多聞資孔子之不倦精神

默會龍潛乎道德之淵，糟粕盡遺，蟬蛻乎簡編之表。有如海岳，猶取涓塵。臣敢不罄竭愚忠，搜尋舊習，正心誠意，雖自得於淵衷，知人安民，尚恭陳於古訓。

謝除翰林學士表

陳薄技於掖垣，已試亡狀。進華資於翰苑，得寵若驚。迫成威命之行，莫遂牢辭之志。外慙公議，仰愧殊私。中謝伏以上聖御圖，萬邦願治。當出令之始，尤藉代言之臣。下十行之札，以勞藩方。賜尺一之書，以詢故老。必能開

喻難陳之意如在宸前發揚易感之情見於言外則凡  
傾耳而注目孰不承德而向風顧如臣愚何以任此茲  
盖伏遇皇帝陛下仁深求舊道大包荒謂迂疎無希進  
之心而朴拙有不欺之實故令親近以示初終臣疊冒  
寵光彌深惴慄文辭甚陋將何以塞重責而酬厚恩肝膽  
可輸敢憚于逆盛意而犯隆指尚祈聖度俯察愚衷

除翰林學士謝宣召表

使車馳遣布溫詔之丁寧里巷聳觀歎詞臣之榮渥省

循非稱慙懼交深中謝臣聞人當志於功名世常難於  
遇合入朝見嫉或屢薦不用而一毀遂行賦命多竒有  
自少著名而終老見棄在昔共患於斯難逢至於仕進  
自結於主知文辭歷司於帝制如臣所值可謂至榮茲  
蓋伏遇皇帝陛下煥乎其有堯章燦然而興周道考觀  
治體務遵燕翼之謀眷禮近臣特舉右文之典星軫傳  
命螭禁增華臣敢不砥礪初心激昂晚節銜恩未報常  
如淵谷之臨遇事輒陳或有絲毫之益

除翰林學士謝對衣金帶鞍馬表

分三服之珍竒爛然出笥下六閑之馭駿效以在庭恩  
義便蕃省循愧歎中謝伏念臣逢辰特幸竊位過優以  
一介之孤踪參兩朝之近侍趣上禁嚴之直併加服乘  
之華喜動親闈不意寒門之遭遇光生異巷共知儒術  
之尊榮矣此蓋伏遇皇帝陛下眷禮近臣講修故事特  
假寵光之渥俾圖報稱之宜束帶與賓客言雖慙鄙野  
攬轡有澄清志敢怠馳驅



謝除參知政事表

忱辭洊列雖已竭於愚衷溫詔俯頒終莫回於誤寵上  
慚主眷下愧師虞中謝伏念臣以一介萍梗之蹤際千  
載風雲之會粵自左史亟踐西垣甫入謝於昕朝已陞  
華於翰苑曾無游夏淵源之學少助商周灑噩之文豈  
謂代言之墨未乾進讀之席不暖復膺聖擢遂與政機  
洪惟盛朝克肖治古體堯蹈舜方當大有為之時鈞渭  
耕莘宜得不世出之輔顧參陪於國論實翊贊於皇猷

非特近比二轄之官蓋得與聞三省之事叨塵若此報  
稱謂何茲蓋伏遇皇帝陛下歷數在躬聰明作后裕於  
待士約以取人念其羽翼之舊臣委以股肱之重寄而  
臣自承顧問積有歲時雖微補衮之功實抱愛君之願  
好生天地之大德既屢誦於舊聞安民帝王之極功尚  
力成於聖志

謝除右僕射表

與聞國論方懷非據之慚誕告王庭俄玷久虛之位震

駭為之汗浹感激至於涕橫中謝竊以元豐正二揆之名寵章特異建炎通三省之務總任愈隆比復兼總於本兵蓋欲倚平於外侮必才能足以立事且望實足以服人端委廟堂贊元而經體運籌惟幄折衝而消萌然後百志惟熙四方其訓如臣蕞爾視此闕然昨入贊於政機繼攝承於樞筦猶祈解免庶寘顛危況若次輔之官顯在具瞻之地位高祿厚豈假寵以示私責望憂深雖忘生而曷報面奏疊煩於天聽囊封屢叩於帝閭至

於辭窮終以虛受茲蓋伏遇皇帝陛下茂日躋之聖宏  
乾覆之仁謂臣早事於初潛察臣初知於上志俾熙帝  
載用秉國鈞昔竇偁用南衙之恩僅居參貳韓維號東  
宮之舊不及登庸敢期一介之微蹤獨際千齡之慶會  
然臣受材甚下賦命多竒奮由單平疎遠之中非有積  
累明白之效繫時獨斷迄此曲成臣惟當內盡孤忠旁  
招衆彥仰不愧俯不作實懷自信之心尊所聞行所知  
少稱非常之遇

郊祀大禮謝加食邑表

禮藏國南惟聖能享慶行海內與物為春顧茲冗散之  
蹤亦被汪洋之澤無功衍賦拜命增慙中謝伏念臣性  
質迂愚材非俊秀徒有心於許國曾無術以濟時偶輔  
龍飛驟陞槐揆慮辜任使旋請退閒逮茲盛舉之成莫  
與駿奔之列不圖惠政遽及孤臣茲蓋伏遇皇帝陛下  
明德惟馨上天敷佑精意以享法遵乾德之良元日用  
幸制踵周人之舊靈休來下帝賚普沾遂令簪履之微

亦冒戶租之寵臣敢不益勤香火少効涓埃食采既豐  
茲抱空餐之愧捐軀自誓尚期未死之前

鄧峯真隱漫錄卷十四

欽定四庫全書

鄧峯真隱漫錄卷十五

宋史浩撰

表

代叔父再辭簽書樞密院事表

能薄望輕自知甚白恩隆命確退揣難安輒冒天聽再  
陳愚悃中謝伏念臣性惟朴野年復衰遲素於榮利之  
塗莫起僥踰之望誤蒙聖造進擢言官曾不淹時已登



上列每覩虛心而納諫常思殞首以酬恩寸效未施輿  
言可畏方自虞於曠斥詎可冒於寵靈矧貳樞庭實陪  
政府豈容濫受以玷明揚雖力貢於懇私迄未承於俞  
旨冰淵是懼啓處靡遑伏望皇帝陛下曲珍睿慈俯矜  
愚守推至仁於從欲收成命於已行臣雖蒲柳之姿猶  
冀涓塵之報

代叔父辭兼權參知政事表

進陪樞轄已荷殊恩超贊化鈞更蒙真寵欲反高明之

聽輒傾危迫之誠中謝伏念臣蚤玷儒流獲叨任進寔  
當晚景曾乏能稱指富貴如在雲霄量分守自甘藜藿  
茲幸明良之相遇遂欣選用之盡公擢孤蹇之衰蹤置  
公明之近列聖君無諫諍之事謬長七人邊陲絕兵革  
之謀濫陪二府疊冒鴻恩之渥方包鵬翼之羞敢料宸  
衷愈推榮典雨露未收於膏澤肺肝再進於忱辭伏望  
皇帝陛下察臣素匪其人憐臣本無佗望許逡巡而引  
避庶彈劾之未加恭俟俞音少安愚分

辭參知政事表

出綸甚寵驚超擢之非常瀝懇莫回愧精誠之未至中  
謝伏念臣奮身寒苦承學空疎初無汗馬之勞偶際飛  
龍之運堯以是道傳舜欣大啓於昌期尹有一德暨湯  
方仰成於近弼豈容衰懦輒與政機伏望皇帝陛下察  
譴薄之難勝憐疲篤之弗逮特收誤寵以穆師言國論  
參陪儻道妨賢之誚禁林近密非無報德之階

辭右僕射表

需章上達冀推從欲之仁批詔下頒未遂由衷之請仰  
勤訓勉采劇震驚中謝伏念臣遭遇異恩參陪近弼顧  
寵靈之疊至知分量之易盈惓惓微誠每每懷懼是以  
牢辭進秩力避本兵曲荷天地之容皆從螻螻之願比  
有負薪之疾亟圖解組之歸不惟眷留且復明陟雖亞  
輔久聞於虛席而西樞已慶其得人併以委臣仍兼錫  
土退思綿薄曷稱登崇伏望皇帝陛下畧反汗之小嫌  
矜額天之至懇疇咨宿望協濟治功庶全聖主知人之

明亦盡微臣量已之義

第二表

游布愚衷未回聰聰揆茲方寸之地實匪飾辭豈伊咫尺之天而弗下耳中謝伏念臣奮身孤遠逢世休明橫草之功初無可錄遺簪之舊偶荷見收既拔擢之非常知顛隳之必至然而位寢高而責大恩愈重而命輕有所報醜實忘生死每於奏事論及邊防謂坐銷鋒鏑之憂在先固金湯之守然後大明中國之義以行王者之

師繼列聖好生惡殺之至仁成吾君寢兵措刑之本旨  
雖處心積慮之若此終圖事揆功之蔑如幽屏是宜具  
瞻曷稱鳳覽輝而下集方多士之朋來驥伏櫪以自憐  
嗟壯心之非昨伏望皇帝陛下明照黜陟覆獲始終姑  
專任元輔以責成功或改命真材而慰輿論曲安叢陋  
俾免傾危貳政機衡尚匪久居之地賜歸田里終祈全  
廣之恩

辭知福州表

成命始行已籲天而祈免俞音尚闕尤躋地以懷憂再  
敢布於危衷庶必回於淵鑑中謝伏念臣猥緣鼠技獲  
際龍飛未閱一暮已躋次輔自審輿情之未服亟辭柄  
任以遄歸旋被洪恩起尸大郡效未殫於絲髮寵以畀  
於旌旄福淺生災哀深茹苦方免素冠之即吉遽頒紫  
詔以陞榮福唐南服之鉅藩星婺魏邸之同鎮退循微  
分皆所不安遂亟上於函封乃曲加於廷渙符仍闕部  
節易章川豈伊孱病之餘獲此便蕃之錫雖伸懇避未

賜矜從伏望皇帝陛下照以無私諒其非據收還大號  
改授耆英庶令衰瘁之身獲免顛冥之禍

辭開府儀同三司表

恭承出綍未孚再瀆之言輒用循牆更致三辭之悃中  
謝伏念臣愚無一得才乏寸長偶依日月之末光獲際  
風雲之嘉會中更閒退兩寄蕃宣茲入奏於楓宸遂同  
儀於槐揆在昔之元勳盛德尚莫敢居如臣之綿力薄  
材豈宜冒處矧今圖治正欲循名內而奉法之臣修明



政事外有翰邦之士屏蔽封疆不敢空言專要成效願  
寢惟行之令佇旌特異之功豈伊微臣敢當是寵伏望  
皇帝陛下深憐懇惻即賜允俞倘矜潛邸之舊勞尚畀  
名城而共理已為過分更復何求其將相之重權暨土  
田之多賦實為僥冒覬賜收還

辭郊祀大禮加食邑表

囊奏上陳冀回淵鑑綸言下逮尚闕俞音輒伸偃僂之  
辭再瀆崇高之聽中謝伏念臣逢時盛際蒙國異恩寢

登台鼎之司洊被侯藩之寵屬園壇之肆類阻預執籩  
暨宣室之受釐迺蒙均貺方上投閒之請敢饗增邑之  
榮聞命靡遑拊躬深懼伏望皇帝陛下亟收成渙俯徇  
愚衷豈特微臣獲免空餐之誚庶令羣下皆無苟得之  
心

再陳尺奏少違寸誠祈寢誤恩庶逃清議荷王言之薦  
降曾天聽之未孚奉牘周章捫心惶懼中謝臣聞自昔  
有國必務施恩加地所以賞功德之成豈應易得多邑

所以惜名器之重亦不濫加臣猥以庸虛久叨榮寵老  
不知止坐糜廩稍之優病且未瘳莫效涓埃之報敢意  
均釐之大賚遽加置散之陳人受則無功辭宜獲命伏  
望皇帝陛下闡淵衷而下燭知慶典之大隆特亮臣愚  
素非矯偽俯回天鑑許賜矜從疊此輸誠期於得請

辭少保醴泉觀使侍讀表

囊封薦貢覬渙號之必還天聽益高仰俞音之尚闕疊  
奉丁寧之訓彌深感懼之私不避重誅敢伸三瀆中謝

竊以攷本朝之故實起諸老於退閒或容納節以歸未  
始遷官而名一時鉅望有若昌期奕世象賢無如公著  
雖結知之特厚曾是禮之未聞敢期獨斷以敷恩遽為  
瑣材而創見謂賞潛藩誦說之益則臣無博聞彊識以  
開寤於淵聰謂酬初政輔弼之勞則臣無竒謀碩畫以  
規恢於遠馭已自知其非據人尤謂之不然況臣老止  
形存病惟骨立徒緣軫記未許休官茲假寵以過優顧  
何功而可稱伏望皇帝陛下闡皇天祐物之眷推慈父

愛子之情既益厚於殊私亦何庸於好爵願寢惟行之  
令用協僉言庶令垂盡之年獲安愚分由衷之懇得請  
為期

再乞休致表

奏函上達祈亟就於休閒詔札下頒猶未孚於懇款輒  
伸再瀆仰冀曲從中謝竊以國張庶恥之維士明進退  
之義出為委質不有其身歸曰乞骸始致其事苟昧夜  
行之鐘漏曷全晚景之桑榆伏念臣性識不明材能無

取偶逢休運躡寘華塗當軸秉鈞有類積薪而居上建  
旄易鎮初無彊草以論功儀已視於公槐班更聯於孤  
棘向也知難而去國茲焉被命以造朝既疊冒於寵光  
復屢陪於閒燕涓塵未報筋力先衰悵來日之無多苦  
沈疴之不赦願辭厚祿以逭餘災伏望皇帝陛下垂鑒  
由衷推仁從欲許上還於印組俾退伏於田廬敢希前  
輩之高蹤自崇清節實賴大君之隆施少益頽齡

辭右丞相表

避權有請昔已幸於矜從注意益隆今忽聞於播告既  
控辭而未獲敢憑悃以載陳中謝伏念臣本乏異能偶  
逢興運夤緣初政僥冒近司揣已無一日之長旋知引  
退去國餘十年之久何意復來獨荷記憐俾從收召高  
官厚祿經緯已愧於素餐綿力薄材揆席豈容於濫處  
惟藹藹王人之吉具赫赫師尹之瞻內有適臣外多耆  
德倘擢居亮采足仰副於責成詎使衰蹤獨妨賢路冲  
申倍於井賦仍進啓於國封被數特優循涯曷稱伏望

皇帝陛下乾坤覆育日月照臨察臣齒髮之已衰憫臣筋骸之難彊亟收還於渙命庶允穆於師言執造化之權既自列其非分侍清閒之燕尚得誦於所聞

## 第二表

囊封薦貢祈免誤恩綸詔載頒未孚危惻輒露再三之瀆仰干咫尺之威中謝臣竊以股肱之臣腹心所寄若古有訓雖曰圖任舊人以試罔功則亦焉用彼相伏念臣材非俊茂學本荒疎適丁繼照之辰乃玷代天之職



靡懷固位確意尊君搜舉賢才講明理道欲輔成於自治將基本於外攘方施覆篲之功已沸鑠金之論保全覆護獨荷恩隆擺脫歸休幾如痛定每思慮之所及雖魂夢以猶驚矧屬暮途耄矣無能為也追惟曩日一之其可再乎伏望皇帝陛下矜其衰殘察其畏怯深念鈞衡之重勿私簪履之微垂拱仰成別選碩大光明之士算計見效決收穹崇博厚之勲

乞解罷機政表

危惘上陳投閒是請溫詞下逮賜可未聞輒干難犯之  
威敢罄不移之守中謝伏念臣素無他技徒抱樸忠年  
已過於乘車所宜請退老當知於納祿再冒寵靈外虧  
止足之風內蹈滿盈之戒既聖主曲憐於舊物願微臣  
敢愛於餘生不量精力之衰覬竭涓塵之報而臣病淪  
肌骨景迫桑榆兩耳聵聵每懼敷陳之誤百骸罷憊不  
勝拜跪之勞痛楚相仍形神俱耗晝廢餐而懷愧夜輟  
寢以興思建國家宏遠之圖本非所及躬簿書期會之

職今又弗能是令論道之私迺作養病之地自知甚確  
決去為宜伏望皇帝陛下賜並堪與恩覃簪履念臣進  
退之義豈有他腸察臣悃悞之私實慙尸位許解機衡  
之任俾收藥石之功庶保殘軀以全晚節

第二表

衰病乞休既輸虔確溫言申命未即允俞輒忘抵冒之  
誅用竭兢危之悃中謝伏念臣奮身寒苦遭世盛明方  
聖主乘乾出震之初膺弼臣當軸秉鈞之寄略無涓埃

之補迄遂丘園之歸然猶秘殿陞華真祠賦祿兩更旒  
節薦領藩方晚加亞保之崇資首冠西清之近侍極數  
十歲久虛之典為一介臣垂老之榮敢期睿眷之非常  
更念朴忠之有素忽拜絲綸之寵再專鼎鼐之司疾恙  
寔加何以專裁於庶政罷瘞已甚難乎觀示於遠人一  
夕屢興終食三喟倘有誤於國事實深累於上知伏望  
皇帝陛下念機務之惟艱察誠心之莫奪俯矜朽憊曲  
賜保全鳳覽德而下之別求者哲馬問途而老矣尚伏

餘年

第三表

封章屢上既盡布於腹心宸眷特隆尚曲存於體貌念  
愚誠之已迫懼淵聽之未孚輒復控陳冀蒙矜惻中謝  
臣竊以事君專於委質徇國在於忘身死且不辭病亦  
奚恤誠以股肱之宣力貴乎精神之折衝苟省決之間  
或至於昏迷則設施之計不勝其差謬矧四海九州之  
廣有一日萬幾之繁倘裨贊之或虧雖糜捐而何益每

思及此深切自驚伏念臣久此支離寢成沈痼入而退  
食難窮鴈鷺之文書出則戴星不耐風霜之途路惟聖  
主尚憂勤而圖治顧微臣敢暇逸以偷安既殫匪懈之  
勞遂抱弗瘳之疾詎有代天理物之地乃容尸祿養痾  
之人故此祈哀必期賜可伏望皇帝陛下皇明委照洪  
造曲成察臣重任之難堪憫臣孱軀之已瘁許從罷免  
乞遂休閒雖來日無多莫報聖恩之大然餘生未泯願  
觀德化之成

進玉牒再辭加食邑拜轉官回授表

輯令典於熙朝誤頒賞秩控忱誠於丹宸尚閱俞音不  
勝跼蹐之情輒整頻煩之瀆中謝伏念臣猥叨帝獎再  
入宰司居懷竊位之憂未知報稱敢冒懋官之寵自速  
滿盈矧茂揚萬世之休蓋盡出羣英之力衍金枝於三  
祖之下積日既深著玉牒於十載之間留心亦久臣偶  
緣末至適會垂成莫逃尸素之譏豈有僥踰之望爰田  
增賦叨受祿之無功私屬踈榮懼得名之非據疊是異

眷尤當力辭伏望皇帝陛下大擴皇明俯昭愚悃亟還  
綸命庶無虛授之嫌允穆師言終免傷庶之誚

第二表

叨承渙渥力控危詞申錫溫言未蒙賜可輒整不移之  
悃屢干難犯之威中謝竊以賞逮有功所以勵僥覲之  
俗化行自近乃能興謙遜之風故公朝不取於濫恩而  
君子尤戒於苟得臣雖至陋理亦粗明倘因總職之微  
勞輒冒出綸之殊寵既自乖於清議曷躬率於庶僚伏



望皇帝陛下深滌倖源益隆主柄再命偃而三命俯冀  
曲諒於愚誠大臣法而小臣庶庶少裨於治體

經脩會要再辭轉官表

疏恩行賞本酬修纂之勤就第投閒敢冒褒崇之秩自  
知既白馬得無詞輒干咫尺之威用致再三之瀆中謝  
竊以爵祿所以勵世名器不可假人故在至明之朝尤  
嚴責實之舉苟無濫吹斯曰當功如臣者愚且無庸老  
知戒得蚤緣幸會獲偶昌期既覩潛藩新又新而作德更逢

初政聖繼聖以重光雖皇風蕩蕩以難名然青史班班  
而可攷爰輯猷為之美別成會要之書謂以日繫月也  
萬年必至於浩穰倘因類分門也一見能知其梗槩臣  
曩叨當軸遂玷提綱未施載筆之勞旋有乞身之請逮  
簡編之大備皆廊廟之羣公且彼合推恩尚爾力辭則  
臣雖回授亦難祇命伏望皇帝陛下覆昏而植有禮輔  
德若天親賢而下無能致嚴如父但詔諸儒而拜賜特  
遺孤迹以示公亟收出綍之恩終遂循牆之避

經修會要辭轉官回授表

賞逮罔功屢形異牘澤流後裔敢冒渙恩更此輸誠終  
期賜可中謝伏念臣本無一得尤乏三長偶承中祕之  
羣英恭纂初元之懿績猥塵庶總曾無歲月之淹繼即  
退閒曷有涓埃之效茲告成於冊典忽濫進於官資力  
控懇辭未回聰聽雖曰特馳於私室是亦下錫於微臣  
惟叨踰非所敢安故煩瀆不能自已伏望皇帝陛下區  
分勞逸旌別幽明察臣無預於討論憫臣粗知於止足

即寢惟行之令用彰無黨之公

辭少傅表

上投閒之請方幸天從疏絕等之恩遽聞廷告荷始終  
之垂眷至感悻之交懷輒整誠忱載干聰聽中謝臣竊  
以貳公弘化夙推亞傅之聯仗節建旄特峻中權之寄  
繫將相之兼領為搢紳之至榮矧令尸祿於內祠復許  
執經於便殿考聖世累朝之故事非元勳盛德而弗居  
豈容遲暮之途併冒便蕃之寵重惟瑣質兩踐臺司執

效篋聞惟日負曠瘵之懼沈痾寢劇迺力辭機務之煩  
既獲從均逸之安敢更拜非常之渥伏望皇帝陛下廓  
乾坤之造昭日月之明不忘念舊之誠深諒由衷之悃  
寢殊榮於非據止成命於已行倘遂懇辭或弭滿盈之  
繫庶因休養迄全疲瘁之軀

第二表


聖主推厚下之仁特頒異數臣子鑒有終之吉確守愚  
誠敢洊布於懇詞冀必回於淵聽中謝伏念臣猥緣宿

恙祈解繁機睿眷曲從俯念桑榆之晚微軀幸會獲全  
樗櫟之生方期收加劑之功迺遽有揚廷之命且避權  
本靳遠寵乃陞華顯之班而上印所以丐休猶竊邃嚴  
之直其於進退出處之際殊失辭受取舍之宜苟冒昧  
以輒居實叨踰而無恥外難逃於公議內有愧於初心  
伏望皇帝陛下獨總威權謹司名器寢出綸之明命畧反  
汗之小嫌倘未忘敬履之餘不容遐棄願始賦真祠之  
祿俾侍燕私庶循止足之規不速貪饕食之誚

三朝寶訓終篇辭轉官回授表

求免而許，勉恩大非，初志不授而將遺，後裔同是洪私，何以辭為其實一也。輒貢兢兢之懇，仰干赫赫之威，中謝伏念臣本乏他長，亦無素學，猥繇攀附，驟被光榮，未殫一得之愚，已處三孤之烈，既慙尸素，復懼滿盈，每自誓於胷中，曾不知其死所，假令捐軀而畢命，寧敢依違矧於進讀，以終篇初，無勞苦亟承下詔，俾遂遷官，瀝肝膽以披投，雖蒙洞照，畀絲綸而回授，猶未全孚，伏况臣子弟

闔門親姻兩族或服勤於州縣或充職於京師曷以堪  
之不帝足矣倘或更貪於釀賞其如可畏之多言伏望  
皇帝陛下曲軫皇慈大明哲鑒物嫌太盛知己極於僭  
踰寵至若驚願且安於靜退





鄮峯真隱漫錄卷十五